

## Köcökpa ka Yudi

### *Masere si-ngü*

Yudi ba köcökpa ne me-ye. Engu ta de gara engu ni ye Yesu. (Mü ena amaka ngü la gbü Marako 6:3.) Ta te Yesu kpo endoro, da erī wü kpara de ngü ka Me ne, wü di engu ni ye na le ta ngü kaka nda-wü de. (Mü ena amaka ngü la gbü Yüwane 7:1-5.) Amba tīne, sidi nga ngü te Yesu zükü tete gbü kpi ne, fū ewü adu afü maguma wü, ale ngü ka Yesu. (Mü ena amaka ngü la gbü Mürü Tima ka Yesu 1:14.) \*Yakobo te di ta kpah gara engu ni ye Yesu ne, du koro ta mere kovo, esüka wü \*kpara ka Yesu agbü Yerüsalema. Te Yudi ngbü eba köcökpa ne tete, ah mala nga ye, gü ba, “Ni de engu ni ye Yesu ne,” nda de. Ah mala bü, gü ba, ni de engu ni ye Yakobo, angü ah le acu ngü ye, gü ba, ni de engu ni Miri Yesu ne, nda de.

Yudi ba köcökpa ne fū wü kpara ka Yesu. Amba sü te wü kpara la ngbü tete, ah sere nda de. Amba wü kpara ngbü efi, gü ba, mere bi ewü ena adi de wü di engu \*Yisarayeale.

Yudi mala ngü fū wü kpara la, gü ba, “Ni fi ta eyi aba köcökpa fū wü, teka ngü ka \*küküwa te Yesu koro di fū ani ne. Amba fū ni adu aje nga gara siti ngü, gü ba, ‘Gara wü mürü mani koro eyi, kpo da efiti wü.’ Teku ngü la, fū ni ayia aba köcökpa ne fū wü, teka amala fū wü, gü ba, ‘Wü lala fi gbü ngü ka Yesu kpekpeke. Wü zoro ngü

la de kpa wü 'basu, angü siti wü mürü mani la ena afti wü fiti.' "

*Dene Mandi ka Yudi fü wü kpara ka Yesu*

<sup>1</sup> De-ra Yudi, engä ni ye \*Yakobo, te ma di kpah labi ka Yesu \*Kurisito ne, ma to mandi fü yi, wü kpara te Me i yi eyi, teka alala gbü ngü ka-ye ne. Wö nih, Me, ngbü ele yi efa sü. Kpah bala, Yesu Kurisito ngbü da eceka kpi fütanga yi me-ye. <sup>2</sup> Me di de yi, de ah le yi de maguma ye 'buru. De ah to kpah gu ngü fü yi fa sü, teka \*züka maguma ye.

*Dene ngü ka wü mürü mani, te ewü le afü ngü ka Me*

<sup>3-4</sup> Wü di engä wüna, ma ngbü ta ereke te-ra, teka aba köcökpa fü yi, teka amala nga \*küküwa te Yesu to fü nih ne. Amba ma du je gara ngü titine, gü ba, gara wü mürü mani yia egiri da wü afti yi. Teka ngü la, fü ra ayia aba köcökpa ne fü yi kere, teka de yi rü kpekpeke. Ma le de yi lala duu gbü ngü ka Yesu. Angü ngü ka Yesu la de zu ngü ka Me, te Me to fü nih, wü kpara ka-ye. Ngü la, wüh ti afü de. Te di bala, ah le de yi ceka te-yi 'be, angü wü mürü mani la zi te-wü eyi, nü ri ngbü esüka yi kpala. Wüh gü ba, "Ani de wü kpara ka Me," amba wüh to maguma wü fü Me nda-wü de. Wüh le Miri Yesu nda-wü kpah de. Wüh ngbü egiri da wü, teka afüfü ngü, teka \*züka maguma ka Me ne, gü ba, "Te mü ngbü emere waza, de wü gara \*siti ngü ba e te mü ngbü ele la, ah mere e de. Me ena aboro siti ngü ka-mü la aboro." Amba ngü la bala nda de!

Ah ka-ye de wu! Yi mere e aje ngü ka-ewü la nda-yi de! Gara wü \*mürü dofo ka Me ba ngü ka wü mürü mani la, gbü \*Ngari Me ta gügü, gü ba, “Te gara, Me ena ato kuru te wü kpara, te ewü ngbü esutu wu, da efiti wü kpara de bala.”

<sup>5</sup> Wü di enga wüna, dene ngü te ma ngbü ele amala fü yi. Me ena ato kuru te siti wü kpara, te ewü le aje riri kaka de ne. Yi ti eyi awu ngü la, teka ngü ta te mere te-ye fü nih, wü di enga \*Yisaraye ne. Ta gügü, Me küwa wü kundu nih, wü di enga Yisaraye, esaka wü vügü ka-ewü, wü kpara ka \*Ezepeto. Amba fütanga ngü la, fü gara ewü ayia ace ngü ka Me, adu amere kögö-nzö fefe. Te di bala, Me ce ta ewü eyi bü bala? Ah bala de! Engu du mörö wü mürü kögö-nzö la 'buru asidi. <sup>6</sup> Kpah bala, ta gügü, gara wü \*malayika yia ce ngü ka Me, fü ewü ayia afü te-wü vügü kaka. Angü wüh ngbü ta ele de ani ngbü me-ani, baka mere wü kpara. Te di bala, Me ce ngü la ta eyi bala? Ah bala de! Me yia i ewü 'buru de nyari, gö gö gö! za ewü, sötö 'buru agbü du, gbü mere mbiri sü. Titine wüh fi ladü kpala, gbü mbiri sü la, eci nga \*adu sikpi, te Me ena akolo ngü ka wü kpara 'buru tete. <sup>7</sup> Kpah bala, wü kpara ka \*Sodomo ake Gomora, bete wü bu wü, gbü wü gara köti ghamari ede ewü ne, wüh le ta aje riri ka Me de. Fü ewü angbü eto te-wü 'buru 'buru da ememere waza, de wü gara ngü ka lümü te ti de. Fü Me ayia acuru ewü 'buru 'buru asidi. Dela ngü te ena asere fü nih, gü ba, Me ena ato kuru te gara ato, te wü kpara, de te wüh le aje riri kaka de ne. Fü ah aza ewü, agü 'buru agbü mere du ka wa fi mere badi, fü

ngü ka-ewü anza kpala.

<sup>8</sup> Amba wü mürü mani la, wüh ce ngü ka Me eyi asidi. Wüh le aje riri kaka nda-wü de, kpah baka siti wü kpapa ta gügü ne. Wü mürü mani la gü ba, Me ngbü emala ngü fü ani gbü roto. Amba ngü ka-ewü la, ah de ngü ka Me nda de! Angü wüh ngbü ememere bi wü ngü ka lümü, de wü waza bü faaa, baka e te ewü ngbü ele. Wüh le akpe cürü mere wü kpapa ka-wü kpah de. Wüh ngbü kpah da esoko wü malayika asoko!

<sup>9</sup> Amba ah de siti ngü teka adi esoko kpapa. Angü Mikayele, te di de mere wü \*malayika ka Me ne, mere ngü bala kpah de. Ta gügü te \*Müse kpi tete, fü Mikayele, ayia akoro teka ati kö Müse. Fü \*Satana ayia kpah akoro da ega yiki ake di. Amba Mikayele soko Satana ta nda de. Mikayele mala bü ngü fü Satana, gü ba, "Me ena akolo ngü ka-ye me-ye." <sup>10</sup> Amba wü mürü mani la, wüh le ngü ka soko fa sü. Wüh ngbü efala ngü ka Me afala, angü wüh je si-ngü gbü ngü ka Me nda-wü 'buru 'buru de. Fingängü ka-ewü ka-ye baka nda siti wü nü la. Tekana ngü de te ewü ngbü emere la, Me ena ato kuru te ewü ato.

<sup>11</sup> Wü di engana wüna, fanü fanü, Me ena ato kuru te wü kpapa la ato. Angü ngü ka wü kpapa la ka-ye 'buru esiti. Wüh ka-wü kpah baka Kayina,\* angü wüh ngbü emere fi bü siti wü ngü. Wüh kpah baka Balama,† angü wüh

---

\* **1:11** 1:11 Kayina de gina kpapa te mörö kiri ye fuh kotö ne. Mü ena amaka ngü la gbü Gina Ngü 4:1-25. † **1:11** 1:11 Balama de gara mürü dofo ka Me. Mü ena amaka ngü la gbü buku ka Namba 22-24. Mü ena amaka kpah gbü 2 Petero 2:15-16.

ngbü eto te-wü 'buru 'buru teka gümü ngü ka jiase. Wüh le aje riri ka wü mere kpara ka-wü nda-wü de, baka nda Küra ta gügü ne.‡ Te di bala, Me ena anza ngü ka-ewü te gara 'buru 'buru asidi, baka te engu mere ta fü Küra ne.

<sup>12</sup> Wü mürü mani la ngbü engbü esüka yi, da ezü e tundu de wü yi. Wüh ngbü emala ngü, gü ba, “Ani kpah de wü \*kpara ka Yesu, baka yi.” Amba ah bala de! Wüh kpe cürü Me nda-wü de. Wüh gü ba, “Ani ngbü da eri wü kpara de ngü ka Me,” amba wüh ka-wü de wü mürü fiti! Riri ka-ewü ka-ye 'buru de wu! Wüh gü ba, “Ani ngbü eceka kpi fütanga wü kpara ka Me,” amba wüh ngbü efi ka-wü bü nzö nga wü. Wüh ka-wü gegege baka agö te ngbü ebiri, baka e te yia eli ali la, amba ah ni jia ra bü kükürü. Wege ena aza ka-ye, anü sü di ka. Ah du li nda tine de. Kpah bala, wüh ka-wü baka mene wü rü, te ewü kpi akpi, wüh ti ari nda-wü tine de, angü wüh gbigbi si ewü eyi. <sup>13</sup> Wü kpara la ngbü ememere ngü ka lümü bü faaa! baka ngu te si fa sü, te ngbü ekö bi wü ca-e enü di, da eli edere ngolo 'düü 'düü 'düü! Wüh ka-wü kpah baka ca-e te wege ngbü efe. Te di bala, yi mere e ari gbü ngü ka-ewü la nda-yi de, angü Me ena ato kuru te wü kpara la te gara, agü ewü gbü mbiri sü, fü ngü ka-ewü anza fi mere badi.

<sup>14-15</sup> Ta gügü, Enoka,§ kundu kundu ye Adama ne, mala ta ngü teka wü mürü mani la eyi. Angü Me sere ta ngü la me-ye fefe, o ngü la mere

---

‡ **1:11** 1:11 Mü ena amaka ngü ka Küra la gbü buku ka Namba 16:1. § **1:14-15** 1:14-15 Mü ena amaka ngü ka Enoka la gbü Gina Ngü 5:18-24.

te-ye la de, gü ba, “Te gara, Me ena ato kuru te siti wü kpara, de te ewü le ngü kaka de ne. Angü Me ena akoro füh kotö sene, de mere bi wü \*malayika ka-ye, gbe gbe gbe, teka aye süka ngü ka wü kpara füh kotö ne 'buru. Ah ena ato kuru te siti wü kpara, teka siti wü ngü te wüh ngbü emere ne, baka siti ngü mündü, te wüh ngbü emala, da esoko Me di ne, de wü gara \*siti ngü kpah 'buru.” Dela ngü te Enoka mala ta gügü, teka ngü ka wü mürü mani la.

<sup>16</sup> Dela eyi ngü te ma le amala fü yi, teka wü mürü mani la. Yi mere e aje riri ka-ewü la nda-yi de, angü wüh ngbü engbü ka-wü fi bü da ega yiki, da emala ambala'ba eküte wü kpara. Wüh ngbü emere ngü ka-wü, baka te wüh ngbü ele. Wüh ngbü egbo nga wü de tete-wü, da eo te-wü memere. Wüh ngbü kpah da ecu ngü wü kpara de mani, teka de ani maka züka e esaka ewü tete.

### *Dene adu ngü, te ma le ari yi di*

<sup>17</sup> Wü di enga wüna, yi fi la nga ngü, ta te wü \*mürü tima ka Yesu Kurisito mala fü yi gügü, <sup>18</sup> gü ba, “Gbü \*adu wü sikipi ka-nih dene, wü gara kpara ena akpo da efala ngü ka Yesu. Wüh ena akpo da emere wü ngü, baka e te ewü ngbü ele.” Dela ngü ta te wü mürü tima ka Yesu mala fü yi. Ah bala de? <sup>19</sup> Enatikine wü kpara la koro eyi! Wüh ngbü eyi esiti fingangü ka-yi, teka de yi ye süka yi. Wüh ngbü emere wü ngü 'buru, baka te ewü ngbü ele, angü wazi ka \*Nzila Wazi Me emaguma ewü nda ma.

20 Wü di engä wüna, ah le de yi lala nda-yi fi bü eküte Yesu, da enü de ngü kaka kpa engagira nü. Yi di fi bü eku gba fü Me, gbü wazi ka Nzila Wazi Me. 21 Ah le de yi lala gbü ngü ka Me, angü Me le yi fa sü. Yi o jia yi te Miri Yesu, angü engu ena aküwa yi me-ye, agbü sü ka-ye agbü kpī, fi mere badi, teka \*züka maguma ye. 22-23 Amba, teka mene wü kpara de maguma wü 'basu 'basu ne, yi di ewu cinga ewü, de yi di kpah esere züka kaje fü ewü kere, angü wüh ena adürü gbü \*siti ngü ka wü mürü mani la. Tekä mene wü kpara, te fingangü ka-ewü siti eyi esaka wü mürü mani la, yi di kpah ewu cinga ewü. Amba ah le fü yi adi ekpe cürü siti ngü ka-ewü la akpe, angü siti ngü ka-ewü la ena asiti kpah fingangü ka-yi.

24-25 Nih gbo nga iri Me, angü engu ena ato wazi fü yi me-ye, teka fü yi arü di kpekpeke, gbü ngü kaka. Te di bala, yi ti adürü te kaje ka Me de. Baka te Me zürü yi eyi nzila ne, ah ena aza yi, akoro di agbü sü ka-ye agbü kpī, fü yi angbü kpala de mere tadu.

Nih gbo nga iri Me!

Engu me-ye de Mere Me, kpikpi ye!

Nih gbo iri Me!

Angü engu küwa nih eyi fi mere badi,  
teka ngü ka Miri ka-nih Yesu \*Kurisito.

Nih gbo nga iri Me!

Engu de mere mürü wazi!

Nih gbo nga iri Me!

Engu de Mere Miri, te ngbü gbü nzö nih fi  
mere badi!

Nih gbo nga iri Me!

Ta gügü, o Me mere kotö ne la de, Me ka-ye  
kü ladü.  
Nih gbo nga iri Me!  
Ngü kaka ti anza kpo fi de, zalü fi mere badi.  
Nih gbo nganga fi bala, nü di kpa engagira nü, fi  
mere badi!  
Gbo nga e ngbü te iri Me!  
Ah di bala!  
Dene adu ngü ka-ra fü yi. De-ra Yudi.



**To Ngü Mürü ka Me bete Gina Ngü (S Sudan)  
Mündü: To Ngü Mürü ka Me bete Gina Ngü (S  
Sudan) New Testament+**

copyright © 2005 Wycliffe Bible Translators, Inc.

Language: (Mündü)

Contributor: Wycliffe Bible Translators, Inc.

All rights reserved.

2020-11-19

---

PDF generated using Haiola and XeLaTeX on 21 Feb 2024 from source  
files dated 29 Jan 2022

9787304f-bc80-5421-9b63-c767eb819b6f